



Ályktanir ársþings SASS 2011

Velferðarmál

Heilbrigðisþjónusta í Heilbrigðisumdæmi Suðurlands

Ársþing SASS, haldið í Vík 28. og 29. október 2011, fordæmir þá aðför sem nú ítrekað er gerð að heilbrigðisþjónustu í heilbrigðisumdæmi Suðurlands. Eftir rúmlega 22% niðurskurð undanfarin tvö ár ætlar ríkið að ganga enn lengra í niðurskurðarkröfum sínum. Gangi það eftir verður ekki hægt að halda úti grunnheilbrigðisþjónustu og mun það stefna öryggi og lífi fólks í hættu. Ársþingið leggur áherslu á að þjónusta heilbrigðisstofnana í heilbrigðisumdæmi Suðurlands verði eflað frá því sem nú er. Fyrir liggur að rekstur þessara sjúkrahúsa er hagkvæmur og gæti orðið enn hagkvæmari með fleiri verkefnum. Mikilvægt er að hafa í huga að sjúkrahúsþjónustan og heilsugæslan eru samofin og niðurskurður á öðrum þættinum hefur skaðleg áhrif á starfsemi hins. Ekki má heldur horfa fram hjá þeim samfélagskostnaði og óþægindum sem fylgja því að flytja verkefni frá heilbrigðisstofnunum á Suðurlandi til Landspítalans og til einkastofa á höfuðborgarsvæðinu eins og stefnt er að leynt og ljóst. Velferðarráðherra og alþingismenn eru hvattir til að standa vörð um heilbrigðisþjónustuna og um leið velferð og öryggi íbúa svæðisins.

Heilbrigðisstofnun Suðurlands

Ársþing SASS, haldið í Vík 28. og 29. október 2011, vill beina þeim tilmælum til ráðamanna að endurskoða niðurskurðarkröfuna sem gerð er til Heilbrigðisstofnunar Suðurlands. Stofnunin þjónar um 20.000 íbúum auk eigendum 15.000 sumarhúsa. Í þeirri áætlun sem nú liggur fyrir mun Heilbrigðisstofnun Suðurlands verða með 26 – 27% niðurskurð frá árinu 2008. Suðurland er náttúruhamfararsvæði þar sem íbúar þurfa að lifa við þá ógn sem steðjar af jarðskjálftum og eldgosum. Sterk heilbrigðisþjónusta verður að vera til staðar til að tryggja öryggi íbúa. Þingið hvetur Velferðarráðherra og alþingismenn að koma í veg fyrir frekari niðurskurð á fjárframlögum til stofnunarinnar.

Fjölgun hjúkrunarrýma á Suðurlandi

Ársþing SASS, haldið í Vík 28. og 29. október 2011, skorar á stjórnvöld að tryggja fjármagn til uppbyggingar hjúkrunarrýma á Suðurlandi í samvinnu við sveitarfélögin. Ársþingið samþykkir að hefja nú þegar vinnu í samvinnu SASS og aðildarsveitarfélaga við að leita allra leiða til að bregðast við skorti á hjúkrunarrýmum. Þörf fyrir fjölgun hjúkrunarrýma á Suðurlandi er veruleg. Samkvæmt samræmdu vistunarmati sem fram fór á landinu í árslok 2010 kom í ljós að 215 manns voru á biðlista eftir hjúkrunarrýmum á landinu öllu þar af 41 á Suðurlandi eða um 20% tilfella sem er langt umfram hlutfall Sunnlendinga af þjóðinni sem nú er um 8%. Þörf fyrir hjúkrunarrými er mest í Árnessýslu en einnig er þörfin mjög brýn í Rangárvallasýslu. Samkvæmt viðmiðum velferðarráðuneytis skal stefna að byggingu einbýla og því liggur fyrir að í mörgum tilfellum þarf að ráðast í framkvæmdir til að húsnaði standist þau viðmið.



ART verkefni

Árþing SASS, haldið í Vík 28. og 29. október 2011, hvetur stjórnvöld og sveitarfélög til að tryggja starfsemi ART meðferðarteymisins á næstu árum. Hlutverk ART teymisins á Suðurlandi er tvíþætt. Annars vegar er það þjónustuúrræði í grunn- og leikskólum og þar unnið í samvinnu við skólayfirvöld og foreldra og hins vegar er það meðferðarræði fyrir þau börn og fjölskyldur sem vísað er til teymisins í gegnum barnavernd. Árþingið leggur til að gerður verði samningur til 3 - 5 ára á milli sveitarfélaganna og ráðuneytanna tveggja; velferðarráðuneytisins og menntamálaráðuneytisins, um starfsemi meðferðarteymisins.

Árþing SASS leggur einnig til að verkaskipting ríkis og sveitarfélaga varðandi barnaverndarmál og meðferðarvinnu verði tekin til endurskoðunar. Grunnskólar og barnavernd eru á ábyrgð sveitarfélaganna og því telur fundurinn mikilvægt að taka til endurskoðunar verkaskiptasamning ríkis og sveitarfélaga og hlutverk Barnaverndarstofu í því samhengi.

Búsetumál fatlaðra á Suðurlandi

Árþing SASS, haldið í Vík 28. og 29. október 2011 tekur undir ábendingar frá aðalfundi Þroskahjálpar á Suðurlandi og beinir því til sveitarstjórnarmanna að taka markvisst á búsetuþjónustu fatlaðra

Þjónustusamningur Sveitarfélagsins Hornafjarðar og ríkis um heilbrigðis og öldrunarmál

Árþing SASS, haldið í Vík 28. og 29. október 2011, hvetur Velferðarráðuneytið til þess að ljúka samningum við Sveitarfélagið Hornafjörð um endurnýjun á þjónustusamningi um heilbrigðis- og öldrunarmál í sveitarfélaginu. Samningur hefur verið laus frá 1. janúar 2007. Sveitarfélagið hefur annast reksturinn frá 1996 og mikilvægt er að eyða óvissu um hann.

Umhverfis- og skipulagsmál

Minnkun svifryks frá Hagavatni!

Árþing SASS, haldið í Vík 28. og 29. október 2011 leggur áherslu á að vatnsyfirborð Hagavatns verði fært til upprunalegs horfs með stíflu í Farinu. Umhverfisáhrif yrðu umtalsverð og jákvæð þar sem svifryk af svæðinu myndi minnka til muna og lífríkið allt njóta góðs af. Um mikið þjóðþrifamál yrði að ræða fyrir allt nærumhverfið. Möguleiki myndi ennfremur skapast til byggingar jafnrennslisvirkjunar er skapa myndi atvinnu á svæðinu á framkvæmdatíma og auka hagkvæmni framkvæmdanna.

Svifryksmælingar

Árþing SASS, haldið í Vík þann 28. og 29. október 2011, telur nauðsynlegt fyrir velferð íbúa að ríkisvaldið hafi forgöngu um rekstur og endurnýjun þeirra svifryksmæla sem þegar hafa verið settir upp á svæðinu.

Stuðningur við sveitarfélög á áhrifasvæði eldgosa

Árþing SASS, haldið í Vík 28. og 29. október 2011, hvetur stjórnvöld til að styðja enn frekar þau byggðarlög á Suðurlandi sem hafa orðið fyrir búsíðum vegna eldgosa á undanförunum misserum. Ljóst er að tjón hefur verið í sumum tilfellum verið verulegt og jafnvel varanlegt. Ástandið er alvarlegast í V- Skaftafellssýslu og í Örafasveit þar sem sveitarfélögin hafa átt við fólksfækkun að etja og erfiðan rekstur.



Mikilvægt er því að stjórnvöld grípi til viðeigandi ráðstafana til að styrkja byggð á þessum svæðum.

Katla jarðvangur

Árþing SASS, haldið í Vík 28. og 29. október 2011 fagnar tilkomu Kötlu jarðvangs. Sú viðurkenning sem þessi uppbyggingaráform hafa fengið er mikil hvatning til frekari framkvæmda á svæðinu sem án vafa munu styðja við ferðapjónustu og byggðaþróun þar. Með þessu er tryggt sjálfbærari og betri nýting á þeirri auðlind sem náttúra svæðisins er.

Vatnajökulsþjóðgarður

Árþing SASS, haldið í Vík 28. og 29. október 2011 leggur áherslu á áframhaldandi uppbyggingu Vatnajökulsþjóðgarðs og að staðið verði við fyrirheit um fjárframlög til verkefnisins.

Sorpurðun

Árþing SASS, haldið í Vík þann 28. og 29. október 2011 beinir því til stjórnar Sorpstöðvar Suðurlands að óvissu um framtíð sorpmeðhöndlunar á Suðurlandi verði eytt eins fljótt og auðið er. Jafnframt verði leitað allra leiða til að minnka umfang þess efnis sem sent er til urðunar.

Skipan vatnasvæðisnefnda

Árþing SASS, haldið í Vík þann 28. og 29. október 2011 bendir á mikilvægi þess að vinna vatnasvæðisnefnda kalli ekki á aukakostnað hjá sveitarfélögunum. Bent er á að fæst sveitarfélög hafa unnið flokkun vatna en slíkt mun reynast afskaplega kostnaðarsamt fyrir sveitarfélögin sem fæst hafa efni á slíku í því árferði sem nú er. Komi til kostnaðar vegna þessa mælist árþingið til þess að ríkissjóður beri hann.

Fráveituframkvæmdir sveitarfélaga

Árþing SASS, haldið í Vík þann 28. og 29. október 2011, ítrekar nauðsyn þess að ríkisvaldið standi við þegar gefin loforð um endurgreiðslu hluta kostnaðar við fráveituframkvæmdir sveitarfélaga. Ljóst er að sveitarfélög munu eiga mjög erfitt með að uppfylla þær lagaskyldur sem á þau eru settar nema með stuðningi. Sveitarfélög á landsbyggðinni búa mörg hver við mjög viðkvæma viðtaka og verða því að fara í mjög kostnaðarsamar aðgerðir til þess að koma sínum fráveitumálum í lag. Árþingið vill einnig árétta að málefnið er ekki hagsmunamál einstakra sveitarfélaga heldur lífríkisins alls og þar með sameiginlegur ávinningur allra.

Í ljósi þess að íslenskum sveitarfélögum er gert að uppfylla strangari kröfur í reglugerð nr. 798/1999 um fráveitur og skólp heldur en tilskipun ESB gerir ráð fyrir, beinir Árþing SASS þeim eindregnu tilmælum til ríkisins að halda áfram að veita styrk vegna fráveituframkvæmda.

Árþing SASS bendir sérstaklega á að taka þurfi út úr reglugerðinni hið íslenska ákvæði sem snýr að því að sveitarfélög við sjó þurfa að uppfylla mun strangari kröfur um þynningarsvæði en gerist og gengur í löndum Evrópusambandsins.

Mennta- og menningarmál

Áskorun til ríkis og sveitarfélaga

Árþing Samtaka sunnlenskra sveitarfélaga, haldið í Vík 28. og 29. október 2011, leggur ríka áherslu á uppbyggingu menntunar á öllum skólastigum og góðrar aðstöðu til fjarkennslu í öllum fjórðungnum. Gott aðgengi að menntun er ein mikilvægasta forsenda byggðar í landinu og stuðlar að nýsköpun í atvinnulífi. Nú sem aldrei fyrr er mikilvægt að efla aðgengi fólks að endur- og símenntun.

Verknámshús við Fjölbrautaskóla Suðurlands

Árþing Samtaka sunnlenskra sveitarfélaga, haldið í Vík 28. og 29. október 2011, skorar á stjórnvöld að hefja nú þegar hönnun viðbyggingar við verknámshús Fjölbrautaskóla Suðurlands á grundvelli þarfagreiningar sem liggur fyrir. Sveitarfélögin hafa þegar lagt fram fé til verkefnisins. Skorað er á ríkisstjórn og Alþingi að tryggja fjármagn til verkefnisins á næstu fjárlögum þannig að verkið geti hafist sem fyrst og stefnt verði að verklokum fyrir haustið 2014. Mikla áherslu þarf að leggja á að vinna gegn brottfalli nema úr framhaldsskólum og er aukið og fjölbreytt verknám við framhaldsskólann þar grundvallaratriði. Ljóst er að brottfall úr framhaldsskólum og hátt hlutfall fólks sem hefur aðeins lokið grunnskólanámi er verulegt vandamál sem ráða þarf bót á, ekki síst með tilliti til aukins atvinnuleysis einkum hjá ungu fólki. Því er þörf stórataks sem tryggir fjölbreytt tækifæri til náms- og endurmenntunar. Bygging verknámshúss við Fjölbrautaskóla Suðurlands er nauðsynlegt skref í þá átt.

ART verkefnið á Suðurlandi

Árþing Samtaka sunnlenskra sveitarfélaga, haldið í Vík 28. og 29. október 2011, skorar á ríkisvaldið að tryggja nauðsynlegar fjárveitingar til ART verkefnisins á Suðurlandi til frambúðar. ART verkefnið hefur staðið frá árinu 2006. Nú starfa 3 sérfræðingar í 2,5 stöðugildum við meðferð og ráðgjöf úti í skólunum sjálfum. Mjög mikilvægt er að gerður verði samningur á milli sveitarfélaganna og ríkisins til nokkurra ára þannig að rekstur þess verði tryggður. ART verkefnið er mikilvægt forvarnar- og meðferðarverkefni sem skiptir miklu máli fyrir fjölmarga einstaklinga og fjölskyldur auk þess sem það styrkir skólastarf og velferð í víðu samhengi.

Háskólafélag Suðurlands og önnur þekkingarsetur á Suðurlandi

Árþing Samtaka sunnlenskra sveitarfélaga, haldið í Vík 28. og 29. október 2011, lýsir yfir ánægju með starfsemi Háskólafélags Suðurlands og leggur áherslu á að sveitarfélög standi áfram þétt að baki félagsins. Einnig leggur árþingið áherslu á að ríkisvaldið tryggi félaginu og þeim háskóla- og þekkingarsetrum sem þegar eru starfandi í fjórðungnum áframhaldandi fjármagn til reksturs starfseminnar. Jafnframt skorar árþingið á aðildarsveitarfélögin að efla samstarf sitt við háskóla- og þekkingarsetur á svæðinu. Þá fagnar árþingið stefnu mennta- og menningarmálaráðherra í málefnum opinberu háskólanna þar sem m.a. kemur fram að fjarkennsla verði notuð í auknum mæli til að bjóða upp á fjölbreytt nám víða á landinu með samstarfi við þekkingarsetur og símenntunarmiðstöðvar. Mjög mikilvægt er að greiða fyrir aðgengi fullorðins fólks að framhalds- og háskólanámi á Suðurlandi, ekki síst þegar kreppa ríkir í atvinnumálum. Þar gegna háskólafélagið og símenntunarmiðstöðvarnar lykilhlutverki.



Háskólanám í matvælafræði

Árþing Samtaka sunnlenskra sveitarfélaga, haldið í Vík 28. og 29. október 2011, leggur til að kannaðir verði möguleikar á að Háskóli Íslands í samstarfi við Háskólafélag Suðurlands komi á fót grunnnámi í matvælafræði/matvælafræði á Suðurlandi en það nám hefur átt undir högg að sækja við H.Í. á undanförunum árum. Bent er á í þessu sambandi að á Suðurlandi er mikil og fjölbreytt matvælaframleiðsla. Matvælastofnun er staðsett á Selfossi, starfsstöð MATÍS á Höfn og starfsstöð MATÍS á Flúðum hefur nýlega tekið til starfa.

Stefnumótun í menntamálum á Suðurlandi vegna sóknaráætlunar 20/20

Árþing Samtaka sunnlenskra sveitarfélaga, haldið í Vík 28. og 29. október 2011, samþykkir að hafin verði vinna við stefnumótun í menntamálum fyrir starfssvæði samtakanna sem nái til leikskóla, grunnskóla, framhaldsskóla, háskólamenntunar og sí- og endurmenntunar. Nýtt verði þau tækifæri sem felast í nýjum námskrám leikgrunn- og framhaldsskóla og jafnframt verði erindi og niðurstöður menntaþings í Gunnarsholti síðastliðið vor nýttar við stefnumótunina. Hugað verði sérstaklega að aukinni samfellu í námi og tengsl skólastiga verði aukin. Menntamálanefnd SASS í samvinnu við starfshóp sem stóð að undirbúningi menntaþings í Gunnarsholti verði falið að hrinda verkefninu úr vör.

Jafnframt ítrekar árþingið mikilvægi þess að aðildarsveitarfélögin móti hvert fyrir sig eigin skólastefnu sem endurskoðuð sé reglulega.

Sameiginlegt ytra mat á starfssvæði Skólaskrifstofu Suðurlands

Árþing Samtaka sunnlenskra sveitarfélaga, haldið í Vík 28. og 29. október 2011, samþykkir að fela stjórn Skólaskrifstofu Suðurlands áframhaldandi undirbúning sameiginlegs ytra mats sveitarfélaga á skólastarfi. Stjórnin fylgist með tilraunaverkefni sem nú er í undirbúningi faghóps á vegum Sambands íslenskra sveitarfélaga og mennta- og menningarmálaráðuneytis og leggur fram tillögu á næsta árþingi um framhald þeirrar vinnu.

Samgöngumál

Uppbygging vegakerfisins á Suðurlandi

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á að áfram verði haldið uppbyggingu og samgönguúrbotum á Suðurlandi. Nauðsynlegt er fyrir framtíðaruppbyggingu samfélagsins að innviðir þess verði styrktir og þar eru samgöngur ein af grunnstöðunum. Mikilvægt er einnig að sporna gegn samdrætti og atvinnuleysi með verklegum framkvæmdum hins opinbera.

Fjármögnun Suðurlandsvegjar

Árþing Samtaka sunnlenskra sveitarfélaga, haldið í Vík 28. og 29. október 2011, hvetur stjórnvöld að leita allra leiða til að standa við fyrri áform um breikkun og tvöföldun Suðurlandsvegjar ásamt nýrri brú yfir Ölfusá við Selfoss og nýti heimild Alþingis um sérstaka fjármögnun verksins. Til þess liggja fjölmörg rök. Í fyrsta lagi er mjög mikil umferð um veginn. Í öðru lagi er há slysatiðni á veginum og í þriðja lagi liggur fyrir að arðsemi tvöföldunar er mjög mikil. Einnig er ljóst skv. könnunum að almenningur telur þessa framkvæmd langbrýnasta úrlausnarefnið í samgöngumálum þjóðarinnar.



Vegna tillagna sem fram hafa komið um veggjöld í tengslum við tvöföldun Suðurlandsvegur hafnar aðalfundurinn hugmyndum um slíkt til að fjármagna þessa framkvæmdir.

Tvívreiðar brýr í stað einbreiðra

Árþing Samtaka sunnlenskra sveitarfélaga, haldið í Vík 28. og 29. október 2011, vekur sérstaka athygli á að enn er fjöldi einbreiðra brúa í vegakerfinu á suðursvæði Vegagerðarinnar. Staðreyndin er að um 20 einbreiðar brýr eru á Þjóðvegi 1 í Skaftafellssýslum, flestar í A-Skaftafellssýslu. Á meðan þær eru við lýði er öryggi vegfaranda ógnað. Sú ógn fer vaxandi með aukinni og þyngri umferð stórra flutningabíla og einnig mikilli fjölgun ferðamanna. Í því sambandi er bent á að Jökulsárlón á Breiðamerkursandi er einn vinsælasti ferðamannastaður landsins. Því er mikilvægt að gert verði stóráttak í tvöföldun brúa.

Nýtt vegstæði fyrir Hornafjörð

Árþing Samtaka sunnlenskra sveitarfélaga, haldið í Vík 28. og 29. október 2011, leggur mikla áherslu á að nú þegar verði ráðist í undirbúning og framkvæmdir á nýju vegstæði og brúm yfir Hornafjarðarfljót. Framkvæmdin er gríðarlega mikilvæg, styttir hringveginn umtalsvert, fækkar einbreiðum brúm og eykur umferðaröryggi verulega. Árþingið leggur þunga áherslu á að gert verði ráð fyrir þessari framkvæmd á nýrri fjögurra ára samgönguáætlun.

Áhersla á héraðsvegi

Árþing Samtaka sunnlenskra sveitarfélaga, haldið í Vík 28. og 29. október 2011, leggur mjög mikla áherslu á að gerðar verði gagngerðar endurbætur á héraðsvegum eftir tímasettri framkvæmdaáætlun. Mikil umferðaraukning hefur orðið á þessum vegum og þeir gegna mun stærra hlutverki nú en áður vegna breyttra atvinnuhátta og stóraukins ferðamannastraums. Þá bendir þingið á að skynsamlegt væri að leggja meiri áherslu á lagningu bundins slitlags á núverandi vegi með nauðsynlegum lagfæringum og spara þar með viðhald malarvega sem dugar yfirleitt ekki nema til skamms tíma.

Ný Vestmannaeyjaferja

Árþing Samtaka sunnlenskra sveitarfélaga, haldið í Vík 28. og 29. október 2011, leggur mikla áherslu á að nú þegar verði hafist handa um kaup eða smíði nýrrar Vestmannaeyjaferju. Reynsla síðastliðins árs sýnir að Herjólfur hentar ekki til þessara siglinga. Ótækt er að að nýta ekki þau miklu tækifæri sem gefast með tilkomu Landeyjahafnar og jafnframt að hún verði eins öflug samgönguleið og kostur er. Grundvallaratriði er að möguleikar til stórbættra samgangna við Vestmannaeyjar verði nýttir til fulls. Árþingið bendir á að um grunnþarfir í nútímasamfélagi er að ræða þar sem ferjan er þjóðvegur til Vestmannaeyja og krefst þess að ferðir til og frá Eyjum verði tryggðar allan ársins hring.

Jarðgöng undir Reynisfjall

Árþing Samtaka sunnlenskra sveitarfélaga, haldið í Vík 28. og 29. október 2011, vekur athygli á því að vegurinn fyrir Reynisfjall er einn erfiðasti farartálmi á Þjóðvegi 1 á Suðurlandi. Nauðsynlegt er að koma jarðgöngum um Reynisfjall á samgönguáætlun. Árþingið fagnar áformum samgönguráðs um viðhald vegarins á Gatnabrún.



Stórskipahöfn í Þorlákshöfn

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á að hafin verði uppbygging stórskipahafnar í Þorlákshöfn. Fyrir liggur að staðsetning orkufrekrar starfsemi í Ölfusi er einkar hagstæð og því nauðsynleg að þar verði byggð upp stórskipahöfn.

Hornafjarðarhöfn

Árþing Samtaka sunnlenskra sveitarfélaga, haldið í Vík 28. og 29. október 2011, telur mikilvægt að vinna þurfi að framtíðarlausn í málefnum innsiglingar um Hornafjarðarós. Tryggja þarf skipum með djúpristu yfir 7 metra nægjanlegt dýpi yfir Grynnslin og í höfninni sjálfri.

Almenningssamgöngur

Árþing Samtaka sunnlenskra sveitarfélaga, haldið í Vík 28. og 29. október 2011, fagnar samningi Vegagerðarinnar og SASS um að samtökin yfirtaki rekstur almenningssamgana á landi frá og með næstu áramótum. Bættar almenningssamgöngur eru þjóðhagslega hagkvæmar, leiða til sparnaðar í rekstri samgöngukerfisins, draga úr mengun og síðast en ekki síst draga úr útgjöldum einstaklinga. Árþingið leggur áherslu á að unnið verði markvisst að því að tengja umfangsmikinn skólaakstur almenningssamgöngum og nýta þar með betur fjármuni sem renna til opinberrar þjónustu.

Landbrot

Árþing Samtaka sunnlenskra sveitarfélaga, haldið í Vík 28. og 29. október 2011, telur mikilvægt að sporna við miklu landbroti af völdum sjávar og jökulfljóta sem ógna byggð, vegum og brúm. Brýnt er að fylgjast náið með landbroti við Jökulsá á Breiðamerkursandi þar sem stutt er orðið frá þjóðvegi niður í fjöruborð.

Hornafjarðarflugvöllur

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á að Hornafjarðarflugvöllur fái aftur löggildingu sem millilandaflugvöllur með áherslu á ferju- og einkaflug. Staðsetning flugvallarins gerir það að verkum að hann er fyrsti kostur í ferjuflugi milli meginlands Evrópu og Íslands.

Hafnir

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á tryggt verði fé til rannsókna á sandburði í og umhverfis sunnlenskar hafnir Hornafjarðarós, Landeyjahöfn, Vestmannaeyjahöfn og Þorlákshöfn.

Fjarskiptamál

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á að allir landsmenn hafi aðgang að háhraða gagnaflutningskerfi. Þeim fyrirtækjum sem starfa á þessum markaði verði gert skylt að tryggja fullnægjandi gæði á þeim svæðum þar sem þau bjóða þjónustu sína. Sjái þau sér það ekki fært láti Fjarskiptastofnun fara fram útboð á þessum svæðum.

Af gefnu tilefni verði farsímasamband tryggt á mögulegum hamfarasvæðum sem og á þjóðvegi 1.



Breytt vinnubrögð

Árþing Samtaka sunnlenskra sveitarfélaga, haldið í Vík 28. og 29. október 2011, leggur áherslu á að tekin verði upp ný vinnubrögð í samgöngumálum, hvað varðar áætlanir, ákvarðanir og framkvæmdir við héraðsvegi og leggur til að tekið verði upp meira samráð við sveitarfélögin. Þá telur árþingið að skort hafi samráð Vegagerðarinnar við sveitarfélögin við endurskilgreiningu vega og nauðsynlegt að bæta úr því.

Atvinnumál

Ferðaþjónusta allt árið

Árþing Samtaka sunnlenskra sveitarfélaga, haldið í Vík í Mýrdal dagana 28. og 29. október 2011, hvetur hagsmunaaðila í ferðaþjónustu til að auka samstarf sín á milli svo þeir verði betur í stakk búnir til að mæta auknum straumi ferðamanna, sem vænta má í kjölfar átaksins „Ísland allt árið“. Suðurland er nú þegar helsti viðkomustaður ferðamanna sem leggja leið sína til Íslands. Árþing SASS leggur áherslu á að bæta aðstöðu og aðgengi fyrir ferðamenn á fjölsóttum ferðamannastöðum. Mikilvægt er að aukin skattlagning á ferðaþjónustuaðila skili sér í uppbyggingu á fjölförnum ferðamannastöðum og viðhaldi þeirra.

Fullvinnsla matvæla

Árþing Samtaka sunnlenskra sveitarfélaga, haldið í Vík í Mýrdal dagana 28. og 29. október 2011, telur mikilvægt að stuðla enn frekar að aukinni fullvinnslu matvæla og tryggja aðgengi að ferskum íslenskum matvælum. Árþingið leggur áherslu á að starfsemi Matarsmiðjanna á Höfn og Flúðum verði kynnt betur á Suðurlandi öllu.

Endurvinnsla

Árþing Samtaka sunnlenskra sveitarfélaga, haldið í Vík í Mýrdal dagana 28. og 29. október 2011, hvetur sveitarfélög á starfssvæði SASS til aukinnar flokkunar sorps og beinir því til Atvinnuþróunarfélags Suðurlands að skoðuð verði möguleg tækifæri til atvinnusköpunar við nýtingu á endurvinnanlegu hráefni.

Rammaáætlun

Árþing SASS, haldið í Vík í Mýrdal 28. og 29. október 2011, fagnar því að nú hilli undir lok þeirrar vinnu sem liggur að baki annars áfanga rammaáætlunar og vonar að með þeirri vinnu verði hægt að nálgast sátt um orkuöflun og nýtingu. Árþingið leggur áherslu á að Alþingi afgreiði málið á sem faglegastan hátt og vandlega verði farið yfir þær athugasemdir sem sveitarfélögin á starfssvæði SASS kunna að senda inn vegna málsins.

Árþingið gerir þó alvarlegar athugasemdir við þá skerðingu skipulagsvalds sveitarfélaga sem tillagan felur í sér.

Orkunýting

Árþing SASS, haldið í Vík í Mýrdal 28. og 29. október 2011, gerir kröfu til að mun stærri hluti þeirrar orku sem framleiddur er á Suðurlandi verði nýttur á svæðinu til atvinnusköpunar, en nú eru 4% framleiddrar raforku nýtt á Suðurlandi en 50% virkjaðs vatnsafls og 70% virkjaðs háhita á landinu kemur frá Suðurlandi. Til þess liggja fleiri rök en atvinnusjónarmið. Flutningur raforkunnar færi um skemmri veg sem þýðir minna orkutap og minni sjón- og umhverfismengun af háspennulínunum. Það er einnig í anda hugmyndafræði sjálfbærrar þróunar að landshlutinn njóti í



meira mæli þess efnahagslega ábata sem virkjun vatnsafls og háhita hefur í för með sér. Ársþingið bendir á að samkvæmt Rammaáætlun falla 6 vatnsaflsvirkjunarkostir í orkunýtingarflokk, þar af 4 á Suðurlandi.

Ársþingið vill jafnframt skora á orkufyrirtækin sem starfa á svæðinu að taka til alvarlegrar skoðunar hvort ekki sé möguleiki á að þau flytji einhvern hluta starfsemi sinnar á Suðurland og leggi með því móti meira til þeirra samfélaga sem þau fá stærstan hluta tekna sinna af.

Stjórn fiskveiða

Ársþing SASS, haldið í Vík í Mýrdal 28. og 29. október 2011, hvetur til þess að frumvörp um stjórn fiskveiða verði tekin til endurskoðunar og tekið verði mið af niðurstöðu Endurskoðunarnefndar um sjávarútveg. Ársþingið hvetur til vinnufriðar og sáttar um sjávarútveg þannig að horfa megi til lengri tíma. Einungis þannig fá sunnlenskar sjávarbyggðir nýtt hin miklu tækifæri sem þær nú standa frammi fyrir. Áframhaldandi pólitískur ófriður mun hinsvegar áfram valda þessum byggðum ómældum skaða.

Ýmis mál

Fangelsismál

Ársþing SASS, haldið í Vík 28. og 29. október 2011, leggur mikla áherslu á að nýju fangelsi sem fyrirhugað er að reisa verði valinn staður í tengslum við núverandi ríkisfangelsi á Litla-Hrauni. Áratugahefð er fyrir starfsemi fangelsis á Litla-Hrauni í góðri sátt við samfélagið. Mikil þekking og reynsla er þar fyrir hendi auk þess sem landrými er nægt. Einnig er ljóst að hagkvæmara er að auka við núverandi starfsemi þar sem sameiginleg stöðþjónusta og aðstaða nýtist en að koma á fót nýrri stofnun. Þá hefur Sveitarfélagið Árborg lýst sig reiðubúið til samstarfs við ríkisvaldið um frekari uppbyggingu. Ársþingið skorar á Alþingi og innanríkisráðherra að taka tillit til þessara sjónarmiða þegar endanleg ákvörðun verður tekin um staðsetningu fangelsis.

Breyting á lögregluumdæmum

Ársþing SASS, haldið í Vík 28. og 29. október 2011, leggst eindregið gegn tillögum sem fram hafa komið á Alþingi um breytingu á lögregluumdæmum.

Ástæður þessarar afstöðu eru eftirfarandi. Í fyrsta lagi er óljóst hvernig útfærslu laganna verður háttað þar sem sérstakri verkefnisstjórn er ætlað að móta megin stefnu um uppbyggingu, skipulag og viðfangsefni lögregluembættanna. Alþingi framselur þar með vald sitt í hendur embættismanna. Í öðru lagi liggur ekki fyrir hagkvæmniathugun vegna þessara skipulagsbreytinga og því alls óvíst að tilgangi skipulagsbreytinganna verði náð. Í þriðja lagi liggur fyrir að Suðurland hefur ákveðna sérstöðu varðandi náttúruvá og nægir þar að minna á jarðskjálftana á Suðurlandi árin 2000 og 2007 og eldgos í Grímsvötnum, eldgos í Eyjafjallajökli 2010 og á Heimaey 1973 auk fleiri eldgosa á svæðinu. Tekist hefur að byggja upp mikla þekkingu hjá starfsfólki embættanna á vettvangi almannvarna. Mikilvægir þættir í því sambandi er þekking á staðháttum og nánd við íbúana. Með stækkun embættis lögreglustjóra lengjast boðleiðir hjá embætti sem stjórnað er lengra frá hinum raunverulegu atburðum og íbúum áhrifasvæða. Á Suðurlandi hafa Vestmannaeyjar sérstöðu vegna landfræðilegrar stöðu sinnar. Samgöngur eru ótryggar við Eyjarnar auk þess sem íbúafjöldi í Eyjum margfaldast oft á ári vegna



ferðamanna eins og gildir raunar um allt Suðurland. Í fjórða lagi bendir ársþingið á að ekki virðist samræmi í tillögunum hvað varðar fjölda embættar eftir kjördæmum. Þannig verða 3 embætti í Norðvesturkjördæmi, fámennasta kjördæmi landsins, en tvö í hinum landsbyggðarkjördæmunum. Í fimmta og síðasta lagi bendir stjórn SASS á að hér er verið taka enn eitt skrefið sem veikir stöðu landsbyggðarinnar með óhjákvæmilegri fækkun opinberra starfa en sem er í andstöðu við yfirlýstun vilja stjórnvalda í byggðamálum.

Stuðningur við sveitarfélög á áhrifasvæði eldgosa.

Ársþing SASS, haldið í Vík 28. og 29. október 2011, hvetur stjórnvöld til að styðja enn frekar þau byggðarlög á Suðurlandi sem hafa orðið fyrir búsisfjum vegna eldgosa á undanförunum misserum. Ljóst er að tjón hefur í sumum tilfellum verið verulegt og jafnvel varanlegt. Ástandið er alvarlegast í V-Skaftafellssýslu þar sem sveitarfélögin hafa átt við fólksfækkun að etja og erfiðan rekstur. Mikilvægt er því að stjórnvöld grípi til viðeigandi ráðstafana til að styrkja byggð á þessum svæðum og einnig verði horft til áhrifasvæða eldgosanna í heild.

Jafnræði á milli landshluta

Ársþing SASS, haldið í Vík 28. og 29. október 2011, hvetur stjórnvöld til að endurskoða vinnubrögð við uppbyggingu opinberrar þjónustu og úthlutun fjarmagns á landsbyggðinni og tekið verði tillit til íbúafjölda, vegalengda og fleiri atriða. Þetta á við um opinbera þjónustu eins og löggæslu og heilbrigðisþjónustu og einnig framlög til menningarsamninga, atvinnuþróunarfélaga og þekkingar- og háskólasetra svo dæmi séu tekin. Ekki verður við unað til frambúðar að búa við það ójafnræði sem ríkir í þessum efnunum.

Fækkun sýslumannsembættar.

Ársþing SASS, haldið í Vík 28. og 29. október 2011, hvetur stjórnvöld til að taka tillit til landfræðilega aðstæðna við fyrirhugaðar breytingu á sýslumannsembættunum.

Skýrsla um eflingu sveitarstjórnarstígs.

Ársþing SASS, haldið í Vík 28. og 29. október 2011, samþykkir að stjórn SASS og stjórn APS verði falið að skipa starfshóp sem hafi það að markmiði að sameina SASS og APS. Fyrir er starfandi starfshópur um eflingu sveitarstjórnarstígsins á Suðurlandi og verði honum falið að vinna úr efni skýrslunnar.

Aukaframlag Jöfnunarsjóðs sveitarfélaga.

Ársþing SASS, haldinn í Vík í Mýrdal 28. og 29. október 2011 mótmælir harðlega þeirri fyrirætlun fjármálaráðherra og innanríkisráðherra að taka 300 m.kr. af 700 m.kr. aukaframlagi Jöfnunarsjóðs sveitarfélaga á þessu ári og verja fjárhæðinni til eins sveitarfélags í fjárhagsvanda, gegn mótmælum Sambands íslenskra sveitarfélaga. Verði af þessum áformum munu einungis 400 m.kr. verða til ráðstöfunar fyrir öll önnur sveitarfélög sem eiga í fjárhagsörðuleikum, sem er allt of lág fjárhæð m.v. þörf þeirra. Ársþing SASS krefst þess, nái vilji ráðherranna fram að ganga, að samþykkt verði a.m.k. 200 m.kr. aukafjárveiting í fjárhagsálagum til Jöfnunarsjóðs sveitarfélaga svo a.m.k. 600 m.kr. verði til ráðstöfunar til annarra sveitarfélaga, sem glíma við erfiða fjárhagsstöðu. Jafnframt tekur ársþing SASS undir þá stefnumörkun Sambands íslenskra sveitarfélaga að varið verði a.m.k. 1.200 m.kr. á ári næstu ár í aukaframlag Jöfnunarsjóðs sveitarfélaga til aðstoðar sveitarfélögum sem eru í fjárþörf vegna erfiðra rekstrarskilyrða.

